

remedinan saca fey matanan

Den un combersacion tocante remedinan fey matanan entre algun personanan un a bisa:

“Un bon remedi contra tosamento ta stropi di calbas”.

Un otro ta bisa cu no tin mihor cos pa kita fret cu azeta di polvo shimaron. Kibra algun foyo y hunta e fret cu e azeta y dentro di un pa dos siman e fret ta cuminza seca. Un tercer persona ta conta cu e tin bon experencia cu aloë (Tocante aloë lesa Taray di Maart 1977) Number cuatro ta bisa: “Ami so no ta kere den e cosnan di kens ey. Un conoci di mi a usa basora pretu pa benta yiu afor y awor e mes ta bentá den santana”.

Sorto di combersacionnan asina hende sa tende varios biaha y hopi vez tin hende cu ta considera e sorto di remarcnan ey como algo di antigua ley. Pero t'asina cu awendia cantidad di medicinan ta wordo sacá fey matanan. Fey aloë companianan comercial ta traha unguentenan contra kimadura. Varios instituto y compania di farmacia ta manda científiconan pa paisnan den Asia, Sur America, Africa etc. pa investiga si tin matanan cu balor medicinal.

Na China, un pais na unda pa miles di añanan caba e pueblo ta usa remedinan fey mata, e gobierno a cuminza cu un campaña pa haci uso mas mihor ainda di e sorto di matanan aki. Un remedi cu a duna bon resultado tabata simianan di pampuna. E simianan mula ta wordo usa pa combati un sorto di bichi cu por haci hende hopi malo. Ephedra ta un otro ehempel di un mata cu mas di 5000 aña caba ta

wordo usá na China. Fey di e mata ey un remedi a wordo sacá cu ta wordo usá pa habri nanishi verstop y pa stimula e sistema central di nervio.

Un mata cu a causa hopi furor tabata rauwolfia serpentina. Esaki ta un mata cu curiosnan di diferente tribonan na Africa y India tabata usa pa mordi di colebra, cholera pa trankiliza hendenan hopi nervioso o hasta loco.

E científiconan cu pa promer biaha a haci conoci cu e mata aki no kier a kere cu e por haci tanto cos pero mas despues cu nan a mira algun caso di locura den cual e uso di e reis di e mata a traha casi manera un milagro, a wordo decidi pa investiga kico tin den e mata. Nan a descubri cu aunke e mata no tabatin mucho valor contra por ehempel cholera, e tabatin varios substancianan cu por wordo bon usa den medicina. Un di nan tabata un remedi cu por wordo usá pa trankiliza hendenan loco-razo. Awendia e uso principal ta pa baha presion di sanger. Na 1925 tabatin un homber di Nigeria cu posicion a bira loco na Inglaterra. Nan a manda busca un curioso masha conoci di un di e tribonan na Nigeria pa yude. E curioso a trece entre otro den su macuto reis di e rauwolfia y e a logra di alivia e malesa. Mirando fey actualmente pa e tempo ey hende por bisa cu e remedi cu e curioso tabata tin tabata mihor cu cualkier remedi cu e dokternan Ingles por a ofrece e tempo ey pa e caso ey.

Na Africa cierto tribonan tabata usa e mata cuabain pa hunta punta di nan flechanan. Cu e flechanan aki

nan por hasta mata un olifant. Fey di e mata aki un substancia a wordo saca cu un cantidad chikito ta wordo usa pa stimula curazon. Indiannan salbahe di Sur America ta usa curare ariba nan flechanan pa mata hende y bestia. E veneno aki ta paralisa hende. Fey curare un substancia a wordo saca cu actualmente ta wordo usa den cirugia pa haci e musculonan slap promer cu operacion. Na 1577 un dokter spaño, yama, Monardes a scirbi un buki tocante e uso cu e Indianan tabata haci di diferente reis, fruta, foyonan.

Dokter Monardes tabata masha impresionada pa e mata di coca di cual e Indiannan tabata usa e foyonan, bruha cu kalki den forma di un bola. Ariba e bola aki nan tabata kauw pa combati cansansio, hamber y sed durante nan biahenan largo.

Awendia ainda e Indiannan cu ta biba den Andes ta usa coca pa alivia nan bida duro. Na 1518 científiconan a logra di isola e substancia cu ta causa e efectonan aki. E substancia aki a haña e nomber cocaïne. Na 1884 un dokter na Austria a muntra cu cocaïne por wordo usa como anestesia local entre otro pa operacion di cataract. Actualmente tin otro substancianan cu tin mesun un efecto ey y cu no por wordo usa como drogaadictivo. E Spañonan a haña tambe den Andes un mata cu por duna yudanza contra malaria, un malesa cu a yega di mata millones di hende. E remedi ta hinca den e casca di Chinchona, un mata cu ta parce esun di koffie. Na 1820 quimiconan a logra di saca

e substancia activo fey e casca y nan a yame quinine combina cu otro remedinan ta wordo usa pa combati malaria. Na 1806 un apprentice di farmacia Aleman a isola pa di promer biahe un substancia activo fey di un mata. E substancia aki tabata morfina, cual e a saca fey di opium. Opium ta wordo traha fy di e mata papaver somniferum. Morfina a haña hopi uso como alivio pa dolor fuerte. Su desventaja ta, manera ta conoci, e peligro cu hende por bira addicto na dje. Despues cu morfina mas y mas di otro substancianan activo a wordo isola pa e quimiconan. Cu e substancianan activo aki nan a sigi experimenta pa traha produktonan mas fuerte fey nan.

Fey morfina heroïne a wordo traha cu ta mucho mas efectivo pa plakia dolor. Na cuminzamento dokternan tabata usa heroïne pa cierto casonan, pero despues di tempo a wordo ripara cu e remedi aki por haci hende addicto den masha poco tempo mes y pa e motibo ey e uso di heroïne den medicina a stop. E palo, yama sauce, tabata duna resina y jugonan cu tabata wordo usa pa alivia dolornan manera di reumatismo; di diente etc. Na 1820 quimiconan a logra saca e substancia activo cual nan a yama salicin. Cu e salicin aki nan a sigi experimenta pa traha un produkto mas fuerte y na 1899 nan a logra traha e substancia cu awendia ta conoci bao e nomber aspirin.

Un droga cu actualmente ta wordo studia pa posibel balor medicinal ta marihuana. Parce cu tin indicacionnan cu e por wordo usa pa cierto casonan di presion halto den wowo. Fey e mata belladonna (un mata masha venenoso) un substancia a wordo saca cual a haña e nomber atropine. Atropine ta wordo entre otro usa pa specialistanan di wowo pa hancha e popchi (pupil) di wowo pa asina nan por investiga e paden di e wowo mas mihor. Tambe e sa wordo usá pa stimula curazon. Originalmente e substancia aki (cu ta masha venenoso) tabata wordo usa

pa muhernan pa pone nan wowo brilla mas.

Un mata cu inespera a causa hopi excitacion ta e, aki na Aruba conoci como, madalena. Na cabamento di e añanan 1950 nan R. Noble cu su asociadonan na universidad di Canada a cuminsa investiga e madalena. E motibo tabata cu den diferente parti di mundo, segun folklore e foyonan di madalena ta yuda contra diabetes. Ningun remede usabel contra diabetes a wordo haña pero en vez di esey diferente substancianan cu por wordo usá contra cierto formanan di cancer a wordo haña den e foyonan. Un di e mihornan tabata vinstastin cu por wordo usa pe e malesa Hodgkin, un sorto di cancer cu ta ataca e glandulan di lymfe, e baso y e higray vincristine cu por wordo usa pa combati leucemia. Vinblastin combina cu otro remedinan sa duna den casi 70 porciento di e casonan alivio di e simptomonan pa 2 o mas añanan. Vincristine combina cu otro remedinan sa duna den casi 90 porciento di e casonan alivio pa algun año hasta cu anteriormente tabata bayendo nan fin. Awendia madalena ta wordo cultiva na India ariba terenonan grandi.

E foyonan ta wordo exporta pa Merca y Europa unda e remedi ta wordo saca afor. Pa traha un gram vincristine mester di casi 500 kilo di foyonan.

Cantidad di matanan mester wordo studiá pa haña esnan cu tin balor. Den un caso 70.000 substancianan saca fey matanan a wordo studia di cual 1800 a duna impresion cu nan por tin balor. Varios vez sa pasa cu un substancia cu a duna hopi di spera ta resulta di ta inutil toch. Fey diferente sorto di biscim antibiotica a wordo sacá por ehempel, penicilline, terramycine etc. Di tempo di antiguo parteranan di diferente pueblonan tabata usa un sorto di biscim cu sa crece ariba centeno (rogge) pa controla sangramento despues di parto. Fey di e biscim aki un substancia a wordo saca cu a haña e nomber ergot. Fey

di ergot diferente otro remedinan a wordo trahá cu te awendia ta wordo usá.

Investigacionnan ta sigiendo. Fey e casca di un cierto palo na Phillipinas cierto tribonan ta traha un sorto di thee cu ta wordo usa contra baso hincha. No ta conoci ainda cu en verdad e ta yuda. Na Peru tin un mata cu e tribo Campa ta usa como anticonceptiva. Esaki tambe ta wordo investiga. Asina tin cantidad di otro matanancu ta bau di estudio.



Revista Taray ta elogio Roy Tromp, e agente policial cu a riska su bida pa salba un otro persona. Noord ta orgulloso di bo, Roy.

